

戒菴老人漫筆

戒菴老人漫筆卷之四

江陰李詡

胡秀婦徐氏於嘉靖某年喪夫時年二十五歲有欲奪其志者不可孀居八載操履甚謹今年癸丑鄉人陳煦忽求納聘父母雖憐其孀獨然知其志姑俟緩圖婦知之七日不食事寢復食至臘月又有富民沈繹求偶乃父徐鉞但云終是不了沈素豐殷人相爭婚喧毆衢巷婦聞之嘆曰耻辱如此何以為人且初

已却陳今若議沈是利其賂不顧于義何以  
自明二十八日庚子遂為自決訃其未死之  
前三日手浣故衣極淨意留焚化死之久沐  
浴更新衣不忘整潔至晚因母病痰喘進蘆  
菹湯一甌又以旨酒勸父飲至醺更餘入室  
取絮被覆姪女候其寢復出拜神堂司命遂  
閉門自縊嗚呼從容就義如此雖世之賢士  
大夫或遭人倫之變多不能行者而一田婦  
能之是真異氣所鍾者耶其為吾江陰之光

何如也。此徐納齋尚德里中事。余得其所親記者云。

小宰云、聽買賣以質劑。司市云、以質劑結信而止。訟質人云、大事以質、小事以劑。鄭康成云、質劑為兩書、一札同、同而別之、長曰質、短曰劑。若今下手書、賈公彥云、漢時下手書、若今畫指券、豈今細民棄妻手摹者乎。不然、則今婢券不能書者、畫指節及江南田宅契亦用手摹也。此載豫章別集雜論中。今細民棄妻

無論能書與不能書皆仍手摹之習若婢券田宅契則不然矣

三十三年甲寅歲春倭亂兵憲任公督兵江陰其子遣人候問作書以遺之我兒絮絮叨叨千言萬語只是要我回御何風雲氣少兒女情多耶倭賊流毒多少百姓不得安寧爾老子領兵不能除訃嚼嚙累革此其時也豈學楚囚對兒輩相泣幘榻耶後來事未知若仰幸而承平則父子享太平之福不幸而有意

外之變。但臣死忠。妻死節。子死孝。咬定牙關。大家成就一箇是而已。汝母前只可以此言告之。不必多語。兒輩莫曉。人生自有寃親。惡滋味也。常有受用處。苦海中未必不是極樂國也。讀書孝親。母胎父母之憂。便是長聚。前亦奚必一堂哉。又詩三首。草草功名六六年。正當烽火動江天。除殘愧乏長驅畧。策馬空操短節鞭。一昔年走馬陰山道。今日驅兵滄海漚。三尺龍泉書萬卷。丈夫何處不為家。二

放船中道轉狂風雪浪排山一點遙宴寢先  
生平旦死安危不在海濤中三公諱環字應  
乾山西長治縣人嘉靖甲辰科進士

江陰侯吳良有賜刀一口上有金錯龍鳳文其  
銘曰百鍊金鋼殺氣難當將軍佩此威鎮四  
方其後人貨于余近里顧山周氏藏之踰百  
年矣近為常熟楊憲副五川公儀得去

三十四年乙卯四月廿五日倭寇殺數人西去  
甚慘五月廿四日早復細兩聞倭在常熟墅

橋捨小船裝物頃報至則常熟邑令王公鈇  
余姪婿父大叅錢公泮并耆民徐察錢鑄錢  
班錢錫宋濤等俱被害其民兵死者不可勝  
數誠為異變

六月廿三日邑父母錢公晚出擒倭被殺從公  
者二十餘人皆死公先禦之于石擡矢盡繼  
以瓦石身被一箭倭賊遁去有團長吳允死  
之公祭以文曰鶴洲主人憫吳團長之死也  
而弔之嗚呼予以千人拒賊之來千人走而



漫筆四卷

肆

予獨後汝以百人追賊之徃百人免而汝獨死噫予幸而汝不幸耶哀汝所以傷予也汝死矣予哀而吊之彼未死矣不知前之走而免者與夫聞風而避者其愧死乎否也一勸一懲風紀攸係汝其有知信予心而領之尚饗是文既書于軸因無暇幾留于前庫中公從兵憲王公崇古命方率邑兵援靖江不虞倭賊之至也得報亟馳接戰身罹數刃馬躍陷澤中不幸死賊且持公首懸于營募諜者

得之始克完殮夫公之死非倉卒遽也乃平  
日所素植也夏季應支俸已獨不支曰民信  
如此何以俸為潛以印印其衷衣已預計郊  
原之莫辨矣嗚呼傷哉始聞倭信時各鄉民  
擁入城者幾萬計王公將不納錢公獨挺身  
任之而民得以不及于難王與任公同入城  
萬民齊聲呼曰惟蘇州任兵爺救得小民王  
兵爺在此我等無靠哭聲震天余所親見誠  
哉莫作亂離人也識者曰錢公之決于死亦

王公有以激之。當日因倭勢大悍，王公不欲出戰，僅僥倖城中。錢公憤然躍馬慷慨赴之，率陷不測，使王肯上下同心以保民為計。錢公豈遽及此哉？錢公名鏐，號鶴洲，湖廣顯陵衛官籍。嘉靖庚戌科進士。中時年二十六，戰死時終三十一歲耳。

十月廿五，常熟縣天雨如赤豆者。

三十五年丙辰四月十五日，抵暮倭賊攻江陰城，月縱鉛彈從城堞隙入城中，危殆不可勝。

言賴曹主簿率其子奮勇止攻去石三塊火  
器一時俱下倭遂退却至六月十四日晡時  
倭賊四面圍截北門更告急人無固志曹父  
子與兵衆僅十二三人縣令且欲移家眷于  
學宮或勸曹暫自為詐曹叱曰此地乃吾死  
所手斫家人一耳又將刃其子衆遂不敢動  
乃大索城中薪貫火擲城外不止又用人糞  
煎滾用鐵銷汙探賊聚處灌之火藥乘風大  
發倭賊始不敢近百萬生靈之命皆曹所賜

也曹名廷慧山東曲阜人貢士是時晝夜不得寢食者凡四十餘日

三十六年丁巳九月初九日在從弟廳中見大蝙蝠約如鷓鴣亦一異也

張羅峯謂四書本經我俱讀至千遍是怎樣用功後為閤老曾云做舉人時有病要尋兩箇紅棗合藥自普門尋至應家橋俱無有今乃人人侈用一變至此誠不可不反正還淳是怎樣憂慮故其達玄殊自偉然不齷齪于末

世局面

杭雲谷者名朝望、宜興人在郡庠、與余辛卯甲午兩次同案應試、頗相交往、嘉靖戊午冬、予自郡歸、出東門、僕輦牽船、遇叫渡童子、年可十五六、云將依人、遂登舫、訊其來歷、據稱周姓、不得于繼母、故出奔、投止、予信之、留余家、凡七閱月、不知其為雲谷子也、有包役人王某者、到余家索役價、廉得其詳、隨走報、予宜興而雲谷正當求訪之、亟急持束幣表迎、時

伊子隨余果兒赴試即遣人伴送還家雲谷  
與余別久而余兒亦未知舊誼漫爾裁答故  
索啟與謝啓皆兩不識面之語耳然其文可  
存存之恭惟君侯江海涵襟斗山凝望高風  
素被久馳慕藺之忱芳譽傾聞將效識荆之  
願如孤匪類敢伺名流遙拱門牆僭陳衷悃  
邇者犬子失教遺家遠遊意或落魄萍沙或  
寄生牛口矣豈期扳鷁舟而附邁仰薦樹以  
思邇得覲君子之光繆推赤子之保誠生死

而肉骨者也。然可宗不失。雖甘效于執轡而  
下。愚不移。終自投于鑿鼓。此則日月之明所  
必察者耳。竊念孤半生殘簡。奄遭九蹶之艱。  
三世寒荆。僅遺一線之緒。眇然離膝。黯爾銷  
魂。寤寐屋舐犢之私。昕夕懸倚廬之望。曾無  
取蜂之諛口。遽有履霜之激心。雖知賴庇于  
二元。豈能遺懷于一日。敢茲冒昧。徑瀆尊慈。  
伏惟君侯澄虛鑒物。推赤置人。再造天緣。曲  
成人道。俾藉餘休。衍宗祧于百世。寧忘披膽



效銜結于他年。孤不勝仰望感激之至。謹啓。  
竊惟鈞大造者。廓形骸而齊物。懷私淑者。越  
宇宙而歸仁。君侯道裕津梁。宗承閎闊。囊括  
賀錦。韜彩霧以成文。仙列膺舟。闢龍門而納  
士。孤披雲已晚。竊附神交。捧袂何年。得傾心  
戀。矧翳桑之惠。及穉子之顛連。而結草之私。  
敢餘生之背負。耶。命傳瑗使。益徵君子之心。  
教錫瑤章。深荷大人之造。第慚非連璧抗義。  
氣於雲霄。喜切薰蘭。放心盟于山海。曩伸菲

事顧辱麾旋豈以大德之可酬襲物之能報  
耶衍祐宗祧寧懷轉石矢心天地敢效忘筌  
尚圖伏謁門墻叩稱犬馬附陳蕪穢潛溷台  
光伏惟尊慈脩原踈陋孤不勝感戴之至謹  
啟

武宗召徐霖在臨清謁見欲授霖教坊司官霖  
泣謝曰臣雖不才世家清白教坊者娼優之  
司臣死不敢拜乃授錦衣鎮撫久漸寵幸至  
以子仁呼之

霖字子仁

每進見必衣破袍帝以

為問對曰臣家貧無衣乃以斗牛襲衣賜之  
至南京一日入暮客聞欲幸霖家霖與近侍  
謀夜深不能治具柰何眾曰汝書生獻茶可  
矣乃潛遣人報其家而以身待將二鼓 駕  
出乃召霖令引至其家家人羅拜但嫌其屋  
小許至北京賜大第居之既而設四果進茶  
帝曰人謂子仁標致乃出茶耶霖叩頭謝  
曰臣不意 陛下俯臨無宿具 帝曰已有  
果但少酒耳於是出酒命霖歌 帝亦自歌

辭樂並不得和從容歡燕。四鼓乃罷。

錢寧既賜姓當權其嬖也。氏死。廷臣多往奠之。祭章既具。衆謂世無也。姓當也字之誤。遂書也。氏寧怒不肯受。其衆為改撰祭章。然後受之。

唐荆川罷官家居。頗自特立。知命之後。漸染指功名。因趙甬江以逢合。嚴介谿遂得復職。陞至淮楊巡撫。殊失初志。鄉人以詩吊之。海門潮湧清淮水。燕塞雲埋白羽旄。子美文章空

寄世。孔明事業等輕毛。避人焚草寧辭諫策。  
馬先師不憚勞。莫訝今朝歸未得出山。何似  
在山高。又有送行一詩云。與君廿載卧雲林。  
忽報徵書思不禁。登閣固知非昔日。出山終  
是負初心。青春照眼行應好。黃鳥求朋意獨  
深。默默囊琴且歸去。古來流水幾知音。此為  
越中余師龍溪王公所作。

黑豈丹方。四季用黑豈五斗。淘洗乾後。蒸三遍。  
去皮大好。蘇子三斗。浸一宿。控出。蒸三遍。今

開口去殼用豈五升蘇子仁三升作小料亦  
可右先搗豈黃為細末然後搗蘇子仁極細  
漸漸下豈黃令勻作丸如拳大入甑內蒸過  
從晨着火至夜半子時住火直至天曉出甑  
至午時曬乾搗為細末服之但以不飢為度  
不得食一切別物第一頓七日不飢第二頓  
四十九日不飢第三頓可百日不飢第四頓  
千日不飢如更服永不飢也不問老少但依  
方服食令人無有憔悴渴中飲新汲水或研

大蔴子漿水飲之若要重喫他物用葵菜子  
研為細末煎湯冷服下菜如金色喫諸物並  
無所損此唐劉景先所進者正德十四年巡  
撫李公充嗣因郡邑飢疫相仍乃書蘇東坡  
聖散子方并前方極民飢疫全活甚衆聖散  
子藥品製法見袖珍方書東坡聖散子叙見  
集二卷聖散子叙見  
集二十四卷聖散  
子後序見續集第八卷葉石林避暑錄話上  
卷辨聖散子方不可用其言甚有理侯與善  
仲景術  
若辨之

猗覺寮雜記載郭元振助喪又有楊虞卿助陳

商事并范忠宣助石曼卿共三人。宇宙間此  
等人詎可多得。若如孟子謂萬鍾不辨禮義  
所識窮乏者得我而為之。則世固不乏矣。

嘉靖三十八年己未旱荒異常。余鄉有具呈于  
縣者。其呈模寫民艱。可謂曲盡。摘而存之。俾  
他日為治安思危之助云。其等住居去城百  
里之外。絕不通潮。離水一丈有餘。最稱高阜。  
自夏初而不雨。三時之望已孤。入秋來尚愆  
暘。千里之跡如掃。鳩語不聞於澤畔。龜文盡



見于田中。上以求之于天。而禱雨不應。下以  
求之于地。而掘井無泉。腹內者盡被拋荒。野  
無青草。沿河者雖經插蒔。田起黃埃。一粒雖  
秀。而無水必沒其根。終為空合。三眼俱齊。而  
無日以待其長。到底無收。晚蒔者以根老而  
尚青。名雖稻而實非穀也。早耘者以根嫩而  
先死。豈非穀之不安釋乎。間有豆苗幾丘。復  
遇昆虫為害。大者先食其葉。名為豆牛。小者  
繼食其花。呼為豆虱。目下雖云禾稿。秋來總

是無成。其切念民遭倭亂之餘。室如懸磬。今  
若遇飢荒之變。命若倒懸。壯者則趨工於水  
鄉。圖升合之粟。而積勞以死。老弱則枵腹於  
戶內。無瓶罍之積。而待哺以食。魚鱉則盡於  
河中。鷄犬則空于閭里。水陸絕而客商不至。  
生路難尋。人心變而移兌不通。盜心頓起。或  
十日方成一布。晨出而見奪于強暴之徒。或  
廿錢糴得一升。夜歸而不到于妻孥之口。黑  
夜則穿窬接跡。白晝而搶奪成群。大兵之後。

而遇凶年。民有七亡而無一得。飢饉之餘而  
遭盜賊。民有三死而無一生。况二麥罄于車  
庖之餘。種子誰能復辦。衣服盡于典賣之後。  
祈寒何以克當。明年之荒歟。可知。今歲之三  
冬難度。豈暇顧夫父母。亦奚有于妻孥。貿貿  
然來。悲號道路。怏怏然去。顛踣溝渠。目擊傷  
心。耳聞酸鼻。欲入城而訴旱。餓殍豈能行百  
里之程。思赴臺而告荒。糟糠何以供一朝之  
費。云云即令他人誦之。便欲流涕。何况經歷者

乎

讀之令人酸鼻多感

唐寅題寒雀爭梅圖云頭如蒜顆眼如椒雄逐雌飛向葦蕭莫趁螭螂失巢穴有人拈彈不相饒又題敗荷春令圖云飛喚行搖類急難野田寒露欲成團莫言四海皆兄弟骨肉而今冷眼看余得其所畫二圖錄之

楊舍居民蘇敏本蘇州人負販累千金死未幾其子某為牙僧門旁有一室嘉靖四十年辛酉為邑城布商何三痴賃居何因歸鑰其室

蘇于十二月二十六日遣子二郎守護所晒穀于室前塲中。二郎年十餘歲。忽不見。家人驚呼。不可得。微聞閉室中有呻吟聲。挾門而入。了無所見。聲似出諸室之大櫥內。櫥亦何所鑰。復挾之。則二郎在焉。手足皆草索繫縛。數圍。草索即平日備以捆布者。錯愕究其故。荅云。適坐門首。見三四人從外來。捽我由戶檻下。猶竄中入。欲殺我。賴公公在此。懇救。尚未下手。今見人來。四散去矣。公公即既死之。

蘇敏也因挈之出夫青天白日之下忽投壘  
子于扁固無隙之楨何鬼物之作祟一至是  
也不踰年紫產皆為人有然二即竟亦無恙  
此得之于親見者所述不誣

嘉靖壬戌歲仲春廿二日丁丑夜雨既霽真率  
窩前雙栢上滿綴金飴次早望之黃綠相間  
瑞氣氤氲殆巧工未易摹寫即而視之若花  
瓣繽紛或五出或六出又如露珠凝滴參差  
雜沓天然奇巧嘗其臭味若糕飴入口甘黏

柔淨有淡而不厭者存焉。次夜復雨而綴者  
更密。遍訪他栢。更無所有。訪諸父老。驚為創  
見。予竊思之。福以德彰。慶洽業皎。矧茲至道  
伊融。大化斯肇。謂之為瑞。予家當多難之餘  
理不當有。謂之為妖。其色黃。中央正色也。生  
于栢木之堅貞。後凋者也。方春景物鮮妍。百  
卉暢達。偶值氣盛。蒸積若芝。茵蒂萐勃然而  
生。未德何福。未業何慶。何妖何瑞之足論乎。  
聊叙顛末。以識歲月。俟論諸博物君子。或能

深達其理也。

以江省錫不祥一災也

余邑中陳鴻江臯謨為南京工部郎中。托伊表姪丁某同乃郎至蕪湖買乃堂壽木。其拙分主事部中嘉興人許爚也。許主事因談及其父名許吉。尚未有材。亦近日所得者。木之上有一許字。下有一吉字。與姓名畧無差。丁歸言之。此十年前壬子六月中事。偶與人論數之前。定追而筆之。

宋鄭特立續皇極經世書元吳草廬澄序之曰



邵子之書其初十二篇以一元經十二會而  
繫之以運與世其次十二篇以九會經二百  
四十運而繫之以世與歲又其次十篇以十  
運經一百一十世而繫之以歲與事元之經  
會始月子訖月亥效天也會之經運始星巳  
開物訖星戌開物法地也運之經世始辰子  
二千一百四十九訖辰亥二千二百六十八  
紀人也紀事起二千二百五十六世內之甲  
辰止二千二百六十六世內之巳未應帝堯

以前不紀無攷也周顯德以後未紀有侯也  
鄭松特立甫為續二百七十五年自唐申宋  
興至甲午金亡近述邵子經世之事遠繼夫  
子春秋之志用意宏矣邵子所紀三千三百  
一十六年間頗有更定書法視昔尤謹論國  
統絕續離合謂興國無所承亡國無所授者  
各為系漢魏晉宋齊梁陳七代一系也魏周  
隋唐梁唐晉漢周宋十代一系也遼金國朝  
又一系也斯論也世儒未之及也噫鄭續邵

之書它時豈無續鄭之書乎雖千世可知也  
特立在前代三預進士貢不第在今日隱處  
三十年不仕獨折行輩與澄友古今因革聖  
賢心迹每共細商焉是書之成以澄能知之  
而俾題其端所纂經說拾遺亦多可取云  
司馬彪注莊子曰彭祖八百猶悔不壽言彭祖  
餌雲母能御女晚娶鄭氏妖淫敗道而死非  
壽終也

康節詩曰耳目聰明男子身洪鈞賦子不為貧

須探月窟方知物未躡天根豈識人乾遇巽  
時為月窟地逢雷處見天根天根月窟間來  
徃三十六宮都是春釋者謂漢天文志曰氏  
為天根楊雄賦曰西極月窟是天根在卯月  
窟在酉也然先天六十四卦圖以乾遇巽為  
姤姤當夏至地逢雷為復復當冬至是月窟  
自午而後著于酉天根自子而後著于卯所  
謂理極微者是也植物體冷而氣在外根在  
下而親地自一陰始故探月窟而知物動物

體熱而氣在內首在上而親天故躡天根而  
識人乾三畫對坤六畫為九兌四畫對艮五  
畫為九離巽俱四畫對坎震俱五畫各為九  
四九三十六又乾一對坤八兌二對艮七離  
三對坎六震四對巽五亦三十六皇極之學  
以不用為用天有四時而冬不用子中其所  
處也處子中則陽自卯而開物以往陰自酉  
而閉物以來是閒來往也由是八卦陰陽消  
長無窮故謂都是春也然復姤本六十四卦

以八卦言殊訝其不類今考朱子語類謂易  
反對者屯蒙之類凡二十八卦者并不反對  
者乾坤坎離頤大小過中孚八卦為三十六  
宮蓋一陰一陽往來而成先天一元之氣也  
邵子之學可謂竒而隱矣當時猶不能知况  
後世邪此在雙槐歲抄中拈出休寧朱風林  
升說云按邵子此詩取先天八卦圖指其  
緘要景象而示人以履運處身之道也邵子  
平日所以為教妙在一動一靜之間詩之天

根月窟。正指此也。所謂天根者。指坤震二卦之間而言。坤震之間。陰既極矣。微陽將生。將生之微陽。天所生之根也。所謂月窟者。指乾巽二卦之間而言。乾巽之間。陽既極矣。微陰將生。將生之微陰。月所出之窟也。陰陽一元氣。非有二也。動而陽。靜而陰。更相禪代。無有窮已。天之寒暑。時之晝夜。人之呼吸。物之榮枯。其著者也。方其動而陽也。非全無陰。陽漸盛。則陰漸微。及其靜而陰也。非全無陽。陰漸

盛則陽漸微。盛之極者消。則微之極者息矣。  
知此則知坤震之間乃乾之靜專。既極而動。  
直之初也。故曰天根。乾巽之間乃坤之靜翕。  
既極而動。闢之初也。故曰月窟。凡草木之甲  
坼必先根。而後萌。坤震之間在圖之下方。其  
象厚地之下。天包地外。地下有天。凡根之所  
著愈深。則萌之所發者愈暢。天根之名所以  
立也。月之魄受日之光。其無光處。月之本體  
也。乾巽之間在圖之上方。其象中天之上。月



望而午盈極而虧而月之本體無光者始微  
出於此月窟之名所以立也氣機闔闢流行  
不息而人物生焉氣之流行其陰陽消長固  
不齊人物固乎其中其純駁美惡豈能齊乎  
以吾身而處乎人物之中必也下極乎動靜  
之間如足之躡天根上極乎動靜之間如手  
之探月窟真有見乎氣機之消息流行者而  
後人物之生所以不齊者可得而喻矣見之  
明體之熟則其所以撫世酬物者必有其適

矣。所謂三十六宮。指八卦之畫為言。剛畫奇。一為一宮。柔畫耦。二為二宮。八卦二十四畫。共三十六宮。陽宮十二。陰宮二十四。三十六宮。不皆春也。以耳目聰明之身。而探月窟。躡天根。知物識人。而灼見其不齊也。而以無所繫累之聞心。徠徯乎其間。翫對待之象。以施泛應之用。畫之對。則皆一奇一耦也。卦之對。則皆三陽三陰也。如是則泛而應曲。而當三十六宮。陽宮不暑。陰宮不寒。無適而非春也。

天根月窟三十六宮易之象也。知物識人。閒  
來往都是春。則其占也。此邵子胸中之全易。  
而凡學者所當以為已易者也。昔人於此詩  
遇字逢字。翫而未審。誤以六十四卦圖復姤  
二卦言之。或又有偏泥於歸根內丹之說者。  
是以本指未徹。愚故詳之。

宋朱弁曲洧舊聞衆尊第四卷中云。崇寧初。范致虛  
上言十二宮神狗居戌位。為陛下本命。今京  
師有以屠狗為業者。宜行禁止。因降指揮。禁

天下殺狗、賞錢至二萬、太學生初聞之、有宣  
言於衆曰、朝廷事事紹述熙豐、神宗生戊子  
年、而當年未聞禁畜猫也、其間有善議論者  
密相語曰、狗在五行、其取類自有所在、今以  
忌器諛言、使之貴重、若此、審如洪範傳所云  
則其憂有不可勝言者矣、余家藏舊通報中、  
有正德十四年十二月十九日辰時牌面、其  
畧云、養豕之家、易賣宰殺、固係尋常、但當爵  
本命、既而又姓、然雖字異、實乃音同、况兼食

之、隨生瘡疾、宜當禁葷、如若故違、本犯并連  
當房家小、發遣極邊衛永遠充軍、事有古今  
相同者、固若此、

浙有獨脚鬼、名山魑、福建浦城常有人見、手曳  
帕子、乘片雲飛過屋頭、甚低、亦不大畏、又能  
盜物、最畏罵人、知輒大罵、多擲還之、酉陽雜  
俎又作山蕭、一名山臊、神異經作慘、一曰操  
過淮、亂離歌六首、邳州哭母小祥、其前曰  
收柳女、信痛割腸胃、人誰無妻兒、骨肉之情

但今日事到這裏。於義當死。乃是命也。奈何。途中有三詩。今錄去。言至于此。淚下如雨。其後曰。一讀此三詩。便見老兄悲痛真切之情。事至于此。為之奈何。凡事只待千二哥至。造物自有安排。一可將此詩呈嫂氏歸之。天命。仍語靚粧瓊瑛。不曾周全得。毋怨毋怨。徐娘以下。皆可道吾此意。當此天翻地亂。人人流落。天數奈何。奈何。一可令柳女環女好做人。爹爹管不得。淚下哽咽哽咽。一此

詩本仍可納之千二哥兄天祥家書達百五

賢妹流離之際亦惟其能以詩義之故信公

之有詩如屈原之有騷皆善明其死者也錢

其妹氏者此又原之女嬭也乎其詩今載指

言鳴呼淚下如雨讀者尚猶而西臺慟哭如

公門下客者未必其涕之無從也又云此卷

翰叢稿見此結損爛將裂以拭酒底公之子

季境適見之識為信公手書驚歎存之後歸

常熟陳原錫家久之為錢允言所得今傳其

題錢世恒庚戌十月二十三日記二泉邵公寶

行一範如作書謝骨兩涕淚紛交加此行已

忘身此書又忘家身家計兩忘未忘者何邪

至哉君與焉大哉夷與華  
片紙今又灰告嘆天無涯

朝廷改奉孔子王號為先師易像為主乃嘉靖

九年庚寅冬十月間事余知出于張羅案今

觀王浚川廷相撰尚書靈寶許莊敏公誥誌

曰先是文華殿有孔子塑像帝欲從古易

以木主公乃以所著道統書上之帝悅即

撤其舊像立皇帝王師八主南向周孔二主

東西向命輔臣與公九人瞻拜主前面諭之

曰朕奉先聖先師于此庶起敬慕以遜志於



學。卿等其罔朕棄。仍賜茶及禮神品物。云。則

實許公成之也。

水東日記云。國初孔廟城隍皆木主。今雖太學亦皆以像。

塑為常。不知其自何時始也。頗聞廣州城隍舊設木主。景泰中。太子太保左都御史今冢

宰王公易

塑像云。

千金方中。服玉泉法。去三尸。堅齒髮。除百病。玉

泉者。舌下兩脉津液是也。每旦起坐。冥目絕

慮。叩齒二七遍。經久自然如流水。瀝瀝下坎

潤之聲如此。則百脉和暢。所以黃庭經云。玉

池精水灌靈根。又曰。漱咽靈液。災不干。

余已在宋時有王子開事甚異人鮮知者余哀  
諸書併載于此以俟搜奇者覽焉趙景安雲  
麓漫抄云王迥字子高族弟子卒為蘇黃門  
婿故兄弟皆從二蘇遊子高後受學于荆公  
舊有周瓊姬事胡徽之為作傳或刪其傳作  
六么東坡後作芙蓉城詩以實其事迥後改  
名遽字子開宅在江陰予曩居江陰常見其  
行狀著受學荆公甚詳紹興間其家盡哀東  
坡兄弟往來東帖示人然散失亦多矣其孫

案以母宗女恩得職常為鎮江都統司機寫  
開其所得帖于都統司。又有謝賜御書詩繡  
裳畫袞雲垂地者。并表用絹朱界以寫之。其  
自珍如此。機宜公之外祖齊安郡王士儂取  
去。為光堯壽。今在天上矣。東坡集芙蓉城諒  
并叙世傳王迥字子高。與仙人周瑤英遊其  
蓉城。元豐元年三月。余始識子高。聞之信然。  
乃作此詩。極其情而歸之正。亦變風止乎禮  
義之意也。

詩載集中胡傳畧云。忽一夕。夢周道服

而至謂君曰。我居幽僻。君能往否。遂從之。但覺其身飄然。須臾過一嶺。及一門。珍禽佳木。清流怪石。殿閣金碧相照。遂與君自東廂門入。循廊至一殿。亭甚雄壯。下有三櫺。相視而聳。亦甚雄麗。廊間半開。周忽入。君少留。須臾。周與一女。即至。周曰。三山之事。息乎。曰。雖已息。柰情何。於是拊掌而去。遂巡東廊之門。門啓。有女流道裝而出者。百餘人。立於庭下。須臾。殿上卷簾。有美丈夫一人。朝服憑几。而庭

下之女。循次而上。少頃。憑几者啟簾復下。諸女流亦復不見。周遂命君登東廂之樓。云樓上有酒具。憑欄縱觀山川清秀。梁上有碑題曰碧雲樓。君未及下。有一女郎復登是樓。年可十五。容色嬌媚。亦周之比。周謂君曰。此芳卿也。與我最相愛。芳卿蓋其字耳。夢之明日。周來。君將語其夢。周笑曰。芳卿之意甚動人。君曰。何也。周曰。芙蓉城也。曰。憑几者誰。三山之事何謂。周皆不對。君曰。芳卿何姓。曰。與我。

同。君感其事。作詩遺周。周臨別留詩云。久事  
幃帷不暫閒。今朝離意尚攔珊。臨行惟有相  
思淚。滴在羅衣一半斑。王明清玉照新志云。  
王子高遇芙蓉仙人事。舉世皆知之。後以傳  
其詞遍國中。於是改名蘧。易字子開。決別之  
時。芙蓉授神丹一粒。告曰。無數歲後當偕老  
于澄江之上。初未喻。子開時方十八九。已而  
結婚何氏。十年而鰥居。年四十再娶江陰巨  
室之女。方二十矣。合卺之後。視其妻則清眇

治容脩短合度。與前所遇無纖毫之異。詢以  
前語。則惘然莫曉。而澄江。江陰之里名也。子  
開由是遂為澄江人焉。服其丹。年八十餘。康  
強無疾。明清壬午歲。從外舅帥淮西。子開之  
孫明之諛。在幕府。相與游從。每以見語如此。  
事與雲溪友議王簫事絕相類。子開趙州人。  
忠穆駿之孫。虞部貲外郎正路之子。晚守濡  
須祠堂焉。張耒宛丘集。王子開朝散。早年以  
疾病謝事。還江陰。求詩為別三首。末首云。避

祿免危疾。棄鉛得黃金。須眉鬚如漆。便覺老  
難侵。江湖足幽遁。市卒或可尋。莫思芙蓉子。  
丹方亂君心。王荊公和東坡歌首云。神仙出  
沒藏杳冥。帝遣萬鬼驅六丁。全篇不傳。東坡  
誰其主者。石與丁。蓋石曼卿卒。後成仙。為美  
蓉城主。丁觀文度未卒。前有諸女御迎。為美  
蓉館主耳。陸放翁云。子開居江陰。既死。返葬  
趙州臨城。故賀鑄有和氏干將句。  
升菴楊公慎撰孝烈婦唐貴梅傳云。烈婦姓唐  
氏。名貴梅。池州貴池人也。笄年適朱姓。夫貧



且弱有老姑悍且淫少與徽州一富商有私  
弘治中富商復至池一見婦悅之自拊心曰  
吾無頭風何以老姬虛拘哉乃密以金帛賂  
其姑姑利其有誨婦淫者以百端弗聽迫之  
弗聽加以箠楚弗聽繼以炮烙體無完膚終  
不聽乃以不孝訟于官通判慈溪毛玉亦受  
商之賂倍加官刑幾死者數商猶慕其色冀  
其改節復令姑保出之親黨咸勸其吐實婦  
曰若然全吾名而污吾姑非孝也乃夕易往

襦、難經于後園古梅樹下。及旦，姑不知之也。將入其室，挺之，手持桑杖，且罵且行，曰：「惡奴，早從我言，又得金帛，又享快樂，乃竟何如而自苦乎？」入室無見，尋之，至樹下，乃知其死。姑大慟哭之。親黨咻之曰：「生既以不孝訟之，死乃稱嫗心，何哭之慟？」姑曰：「婦在，吾猶有望；婦死，商人必倒賊。吾哭此金帛，不哭此惡奴也。」尸懸於樹三日，顏如生。樵夫牧兒咸為墮淚。每歲梅月之下，隱隱見其形冉冉而沒。有司

以礙于官府之故終不舉余舅氏喻士積薄  
遊至他州稔聞其事作詩吊之歸屬慎為傳  
其事嗚呼婦生不辰遭此悍姑生以梅為名  
死於梅之誅冰操霜清梅乎何殊既孝且烈  
汗青宜書有司失職咄哉可吁乃為作傳以  
附露筋碑之趾

余邑定山葛維善雅尚詩禮在成弘間為園亭  
于定山之上凡三十一景曰玉泉山房曰鹿  
跑泉曰白雲塢曰三峰堂曰小桃源曰紫霄

峰曰鳴玉亭曰清風逕曰蘋香沼曰翠雲屏  
曰仙人洞曰歸菴曰旌節橋曰石船曰望江  
臺曰濯纓澗曰雲香坡曰舜田曰起蕙亭曰  
修禊亭曰熙春臺曰綠漪精舍曰醫俗亭曰  
曲曲池曰孺鳩曰平艇曰棲鳳所曰凝翠屏  
曰夾花溪曰菜畦曰機竹當時縉紳名公騷  
壇高士咸賦而咏之積成一巨卷後流落于  
石橋趙氏某之手趙不知愛惜余季弟其婿  
也一從嫁女奴歸探問携來為糊鞋襯具余

知而索之。毀壞不可收拾矣。惟侍郎徐主一  
公恪所題跋語完善可讀耳。主一手澤又余  
所素珍也。錄之。其跋云。爲徐姻。子姪女歸  
時。嘗一至定山。時維善君年尚富。從予游山  
中。林壑參差。青松白石而已。茲予從子統將  
維善意持此卷。欲乞題于予。感念今昔。爲之  
悵然。噫。山中景致固天造地設。非人力可爲。  
然酌量品題。模寫風物。必因人而起。此定山  
雜詠之所由作也。今予年邁古稀。維善亦將

耳順。倘得暇。當再遊山中。以續九老會。辭章云乎哉。

常熟蕭觀瀾韶遺集一冊。乃余少時業師益齋趙公所校錄者。中有桑寄生傳一篇。取藥名成文。足稱工巧。殊可資玩。傳云桑寄生者。常山人也。為人厚朴。少有遠志。讀書數百部。長而益智不凡。雌黃今古。談辭如玉屑。狀貌瑰異。龍骨而虎睛。膂力絕人。運大戟八十斤。走及千里馬。與劉寄奴為布衣交。劉即位。拜為

將軍目含雞舌侍左右恩幸無比薦其友周  
升杜仲馬勃上召見之曰公等所謂參苓芝  
朮不可一日無者也何相見之晚耶生即進  
曰士以類合猶磁石取針琥珀拾芥若用小  
人而望其進賢是猶求柴胡桔梗於菹澤也  
然頗好佛與天竺黃道人蜜陀僧交最善徒  
容言于上上惡其異端弗之用木賊反自號  
威靈仙與辛夷前胡相結連犯天雄軍上謂  
生曰豺狼毒吾民柰何生曰此小草寇臣請

折箠笞之上大喜、賜穿山甲、犀角帶、問何時  
當歸、曰：「不過半夏。」遂帥兵往、乘海馬攻賊、大  
戰百合、流血餘數里、令士卒挽大黃、發赤箭、  
賊不能當、遂走、絆于鉄蒺藜、或踐滑石而躓、  
悉追斬之。惟先降者獨活、以延胡索繫之、而  
歸、獲無名異寶、不可勝計。或曰：「馬援以薏苡  
興謗、此不可留也。」俱籍獻之。上迎勞生曰：「卿  
平賊如剪草、孫吳不能過也。」因呼為國老、而  
不名。生益貴、賞賜自積、鍾乳三千兩、胡椒八



百斛以真珠買紅娘子為妾、紅娘子者、有美  
色、髮如蜀漆、顏如丹砂、體白而乳香、生絕愛  
之、以為牡丹芍藥不能與之爭妍也、上聞、賜  
以金銀花玳瑁簪、月給胭脂胡粉之費、一日  
上見生、體羸、謂曰、卿大腹頓減、非以好色故  
耶、宜戒淫慾、節五味、以自養、且令放遠其妾  
生不得已、贈以青箱子而遣之、然思之不置  
遇秋風起、因取破故紙題詩以寄焉、其詩曰  
牽牛織女別經年、安得鸞膠續斷絃、雲母帳

空人不見、水沉香冷、月娟娟、澤蘭憔悴、渚蒲黃、寒露初凝、百草霜不共、玉人傾竹葉、茱萸甘菊、自重陽、妾答之曰、菟絲曾附女蘿枝、分手車前、又幾時、羞折紅花簪鳳髻、懶將青黛掃蛾眉、丁香謾比愁腸結、豆蔻長含別淚垂、願學雲中雙石燕、庭烏頭白、竟何遲、天門冬日曉、蒼涼落葉愁、驚滿地、黃清淚暗銷、輕粉面凝塵、閒鎖鬱金裳、石蓮未嚼心、先苦、紅豆相看恨、更長、鏡裏孤鸞、甘遂死、引年何用覓

昌陽生得詩情不自勝乃言于上召之使返然生既溺于欲又不能防風寒所侵寢以成疾面生青皮兩手如乾薑皤然白頭翁也上疏乞骸骨上曰吾曩者預知子之有今日矣賜神麴酒百斛以皂角巾歸第養疾而卒作史君子曰桑氏出於秦大夫子桑生蓋桑白皮之後也有名螟蛸者亦其遠族生少孤羸僅知母而不識父卒能以才見于時非所謂邠林之桂枝沅江之鱉甲也與其後耽于女

色甘之如石蜜而忘其苦于熊膽美之如琅玕而不知其毒甚于烏蛇也迷而不悟卒以

傷生惜哉

觀瀾三十餘年此傳又其初年作使假之年容可量也或曰因其同

邑有桑姓者所行多不謹故特為此傳語多含譏刺似其人今遠不可詳矣意者其然與

孔子不悅於魯衛章以理勢觀之凡人至其國

者有所主而後可為之臣孔子主司城貞子

之家而為陳侯周之臣此其實事也若說能

擇所主止言主於貞子足矣何關為陳侯周

之臣而并言耶若言孔子主在宋臣而為臣

于陳其事兩無干涉何所與而言之邪若言孔子去宋時主于貞子則朱傳何以從史記世家著于至陳之下邪若言貞子為陳侯周臣豈有宋之賢大夫而出仕他國邪若言貞子為宋臣司城司馬皆大官也貞子為司城既主之而桓魋為司馬乃欲殺之邪司馬既欲殺之孔子尚微服而去况敢留其國都而主于司城邪若周為一國之臣本文桓司馬上有宋字而司城貞子之上豈獨無宋字邪

反覆皆礙、若以官名為疑、饒氏倪氏皆以司  
城為宋官、惟見朱子以為宋大夫、而據以為  
說、他無所考也、安知陳不亦有此官如太宰  
之稱、吳宋二國皆有之邪、又朱傳言主於司  
城、貞子在孔子去至陳之下、據世家為說、新  
安陳氏亦是以文勢意度之耳、非真見也、當  
作陳臣為是、朱子只為司城為宋官、而以貞  
子為宋臣、趙岐曰、陳侯周、陳懷公子也、為楚  
所滅、故無謚、但曰陳侯周、疏按史記孔子之

適宋司馬桓魋欲殺孔子伐其樹遂適鄭與  
弟子相失遂至陳主于司城貞子家歲餘吳  
王夫差伐陳取三邑而去由是推之則司城  
貞子乃陳國之卿非宋卿也又曰陳懷公之  
子名越者乃為湣公又按湣公年表六年孔  
子來是則陳侯周即湣公是為懷公之子湣  
公即位二十四年楚惠王復國以兵北伐殺  
湣公遂滅陳而有之是歲孔子卒于魯又孔  
子世家湣公六年未至居三歲遂復適衛而

歸魯是潛公八年去魯也、由此推之、則孔子主於司城貞子、是為潛公之臣矣、

談參傳、談參者、吳人也、家故起農、參生有心、義居湖鄉、田多窪蕪、鄉之民、遊農而漁、田之弃弗闢者、以萬計、參薄其直、收之、傭飢者、給之粟、鑿其最窪者、池焉、周為高塍、可備坊洩、闢而耕之、歲之入、視平壤三倍、池以百計、皆畜魚、池之上、為梁、為舍、皆畜豕、謂豕涼處而魚食豕下、皆易肥也、塍之平阜、植果屬、其汙澤



植菰屬、可畦、植蔬屬、皆以千計、烏鳬昆蟲之屬、悉羅取法而售之、亦以千計、室中置數十甌、日以其分投之、若某甌魚入、某甌果入、盈乃黷之、月黷者數焉、視田之入、復三倍、參且織、畝憚費、平生無統綺服、非大故不宰割、每飯熟、一卵、竅可容箸、籍而啖之、飯畢、封其竅、留之再飯、三飯乃盡、以故參之貲日益、嘗而藏者數萬計、然弗子、僅有女、女所適者某、睨其藏久之、一日參病、亟謀請曰、翁脫不請、即

誰嗣者、參曰、已有屬矣、若將利之耶、此去之  
參死、某乃謀戕其所屬者、蔓而戕者、幾人構  
為獄、官沒參之產、某盡歸其藏云、論曰、昔馬  
遷論貨殖、謂巧者有餘、拙者不足、噫、亦安所  
論巧拙哉、莫巧于參矣、參自奉不輕、盡一躬  
有餘、胡為哉、矧參無遺筭矣、於身計情如也、  
巧耶、拙耶、千匱百匱、歸一匱矣、謂千匱百匱  
者、巧耶、謂一匱者、巧耶、余故論之、使效參者  
評焉、此邵北虞圭潔所撰也、談參、寔譚曉常

熟湖南人

行三參者三也

北虞係同邑。不欲顯論之

耳。余聞其挿蒔後見鶴在田覓食恐踐踏傷

禾根謂僅驅之無以示懲也用細繩百丈捲

置瓦瓶中繩頭繫鰕鱖之類鶴不知而吞之

繩已投于腹不得斷旋飛旋下瓶垂垂匝地

哀鳴莫脫自後群鶴無敢翔集此境為禾害

者一日有持鉅冊裝潢絕勝索價甚廉却之

門客頗訝其未諳渠曰此冊來歷不明得之

必貽累乃其弟私自賤獲藏訖後盜露波及

費百金如所料傳云法售昆虫之屬余亦聞  
其一事凡佃人每戶課其紡繅娘凡幾枚以  
小麥榦為籠盛之携至蘇城每一籠可取錢  
一二百文紡繅娘即絡緯也覓之草間不直  
一文佃人本不善納如此類未易更僕數丁  
南湖奉嘗為語以嘲之曰其取利也窮天極  
地而盡人其得禍也殺身亡家而滅族倭亂  
時曉獻萬金城其邑城後邑令王叔果撰譚  
曉祠議以旌其功云

余老朽無識。然史編所記父老所傳。古今興廢。畧窺大都。近見錢侍御海山籍之傾蕩。殊可駭愕。其甲第庄所。大小四十餘處。課租田畝。參萬有餘。財貨山積。家口千計。以至園林亭榭之美。歌童舞女之妖。畫船廐馬之盛。莫可殫述。數日間。悉為鄉里豪強輩群起而分括之。若許庄。若馬路庄。約其屋之數。俱四五百間。高牆深池。規模偉麗。僅兩日。搶拆一空。即成白地。其他有原主爭執者。或稍留十之二

三亦遂歸原主。竟非錢氏有也。其李庄者。乃  
余家故物。余目睹地方效尤。屋材樹竹米穀  
椅卓。閭然瓜分而去。全仲弟稍稍護持。終又  
歸諸豪強矣。揆厥所由。海山原無貫盈大罪。  
祇其世居傍江。盜出沒。逮徼僕壯子。恃勢  
放恣。一等游惰頑民。或賃屋傭保。或佃種棲  
息。私相依藉。而海山漫不檢察。此輩一有敗  
露。人皆指稱窟穴。謗播人耳。疑信無憑。遽為  
士流所唾罵。怨家又起而焚誣之。以致上官

亦駭于耳。聞三人市虎。不能免也。枝纏蔓結。  
僕輩悉名大盜。日夜狂奔。遠離為幸。于是屋  
居不守。人人得以攘奪之而不問也。海山兀  
處。邑旅攻擊殆無虛日。兩子諸僕相繼相繼度死  
獄中。屍棺暴露。行道酸辛。視諸田宅。特身外  
長物耳。奚暇爭執耶。非不欲也。勢不可也。一  
旦有此大變。或曰足以懲官豪。然寔有以煽  
刁惡。抄沒之權。細人得擅以肥家。恐非清明  
世界所宜見也。時在嘉靖丙寅之春。仲三月。

又見有利成一冊曰稔惡畧者。中載海山題  
拂水巖亭春聯云無邊風月供嘲弄有主江  
山孰剪裁欲坐以謀為不軌其他虛實姑不  
暇論不軌之謀何容易以陷人耶海山上耿  
兵憲詩有官如曾母雖投桴家誦參乎豈殺  
人之句亦可憐矣

因卷二附錄中情循復行爲一

浙錢塘田學憲汝成撰阿寄傳云阿寄者淳安  
徐氏僕也徐氏昆弟別產而居伯得一馬仲  
得二牛季寡婦得阿寄阿寄年五十餘矣寡



婦泣曰、馬則乘、牛則耕、踉蹌老僕、迺費我藜  
羹、何寄、嘆曰、噫、主謂我力、不若牛馬耶、迺盡  
策營生、示可用狀、寡婦悉簪珥之屬、得銀一  
十二兩、畀寄、則入山、販漆、替年而三其息、  
謂寡婦曰、主無憂、富可立致矣、又二十年、而  
致產數萬金、為寡婦嫁三女、婚兩郎、齋聘皆  
千金、又延師教兩郎、既皆輸粟為太學生、而  
寡婦則皁然財雄一邑矣、頃之、阿寄病且死、  
謂寡婦曰、老奴馬牛之報盡矣、出枕中二楮、

則家計鉅細悉均分之曰以此遺兩郎君可  
世守也言訖而終徐氏諸孫或疑寄私蓄者  
竊啓其篋無寸絲粒粟之儲焉一姬一兒僅  
敝縕掩體而已嗚呼阿寄之事予蓋聞之俞  
鳴和云夫臣之於君也有爵祿之帶子之於  
父也有骨肉之愛然垂纓曳綬者或不諱為  
盜臣五都之豪為父行賈臣良獻苦否耳德  
色也迺阿寄村鄙之民哀邁之叟相嫠人撫  
髻種而株守薄業戶祚彫落溝壑在念非素

聞詩禮之風。心激寵榮之慕也。迺肯畢心殫  
力。昌振鉉基。公爾忘私。斃而後已。是豈尋常  
所可及哉。嗚和又曰。何寄老矣。見徐氏之族。  
雖幼必拜。騎而還。諸公必控勒將數百武。以  
為常。見主母不睇視。女使雖幼。非傳言不離  
立也。若然。即縉紳讀書明禮義者。何以加諸  
移此心也。以奉其君親。雖謂之大忠純孝。可  
也。又沈石田客坐新聞記。義僕云。范信者。崑  
山龔泰云。亨家奴也。泰家不造。食指衆而日

不能給乃鬻信及其妻於常州夏雉瀆某家  
數年不通正德初泰益貧甚無所依歸一日  
適經其所遇信於途信見故主泣拜地下懇  
延至新主家謂新主曰此信故主今流落在  
此信心不忍欲望容留信夫婦願不惜蚤暮  
傭力報主以圖供養故主新主義之聽允其  
志而信俟農事稍閒即肩負小販往來枊落  
中市賣以給迨今不衰嗚呼信一奴耳為主  
轉賣其身尤戀戀不忘其義也故書而表之

以愧為人臣。食君之祿，不顧禮義，不能執義，而反賣國者，右阿寄范信二僕，即求之古人中，不多見矣。雖曰未學，吾必謂之學。都此類是也。豫讓以衆人事衆人，畜之語，聞范信之事，不有媿哉。宋時沈攸諧史云：四明戴獻可，處而家世堆于財，凡客至，必延欸士，聞風而歸者，皆若平生歡也。獻可死，止一子伯簡，年十八，九未歷世故，暴承家業，用度無藝，里中惡少，因得與交，狎邪不數歲，破家。止有昌國縣魚鹽竹木之利，尚存舊僕楊忠主之，自獻可無患時，出納無纖毫欺。伯簡家業既蕩，獨揚忠所掌，猶可賴為衣食資，遂往焉。楊忠拜哭盡哀，日與婦共事之，籍其資財之簿以獻。

伯簡大喜、謂我固有之物、仍復妄為、其將從  
輩聞之、又欲誘蕩焉、楊忠哭諫、不領、一日伯  
簡與其徒會飲、呼蒲、楊忠挺刃而前、執其尤  
者、擗首頓之地、數曰、我事主人三十餘年、即  
君年少、爾輩誘之為不善、家產掃地、幸我保  
有此業、汝必欲蕩之、靡有孑遺邪、我斷汝首  
告官、請死、報吾主人于地下、又大叱、令伏地  
受刃、其人哀號伏罪、請自今不敢復至、楊忠  
禁固良久、收刃却立、口爾畏死、給我耶、其人  
號曰、請自今不敢復至、忠曰、如此、貸爾命、再  
至、必層裂爾軀、遂出帛數端、曰、可負此亟去  
其人疾走、忠遂揮涕謝、伯簡曰、老奴驚犯、即  
君自今改前所為、但聽老奴盡心力役、不二  
三年、舊業可復、不然、老奴當即日自沉于海  
不忍見、即君餓死、以貽主人門戶羞也、伯簡  
慙泣、自是謝絕群、不逞、脩謹自守、一聽楊忠  
所為、累數年、盡復田宅、楊忠事之彌謹、吁、楊  
忠其賢矣哉、真不負其名矣、其視幸主人之

禍敗、從而取之者、孰  
非揚忠之罪人乎

九  
陽  
書  
卷  
之  
第  
一

煑煉鹿霜膠法、新麋鹿角各一對、截二寸、汲長  
流水浸三日、刷去腥垢、每觔用楮實子一兩、  
桑白皮、黃蠟各二兩、無油淨鍋、魚眼湯、不斷  
火慢煑、勿令露角、常添熱湯、不可用水、三晝  
夜取出、削去黑皮、薄切、曬乾、碾末、即成霜也。  
右將煑角汁、濾去滓、慢火如法熬濃、傾磁盆  
內、候冷凝、切作片、陰乾、成膠、煑麋角霜法、新  
麋角一具、寸截、流水內浸三日、刷腥穢、以河

水入砂瓶、或銀瓶內、以桑葉塞瓶口、勿令漏  
氣、炭火猛煮、時時看候、如湯耗、旋益熱湯、一  
日許、其角爛似熟、山羊插得酥軟、即止、未軟  
更煮、慎勿漏氣、漏氣則難熟、取暴乾為粉、其  
汁澄濾、候清冷、以綿濾作膠片、盤盛、風中吹  
乾、麋角膠別入藥、野客叢書曰、麋茸補陽利  
于男子、鹿茸補陰、利于婦人、  
人按月令、仲夏日鹿角解、仲冬日麋角解、鹿  
以夏至墮角、而應陰、麋以冬至墮角、而應陽、  
故知二者陰陽之性不同也、今夫鹿肉暖、以  
陽為體、麋肉寒、以陰為體、以陽為體者、以陰  
為末、以陰為體者、以陽為末、末者角也、其本  
末之功用不同、又如此、



學院耿楚侗定何著二孝子傳姪輩赴試得以  
呈余者二孝子都逸其名氏余聞諸長老先  
生言為紀其大凡云其一丐子也行丐吳市  
中吳門有貴人月夜道橋上聆其下有歌唱  
聲下覷之則丐子也坐一老嫗塊上以所丐  
得酒捧缶而跪進焉唱蓋以侑云貴人訝詰  
之丐子驚喜曰儂妾人聊為阿母懽耳貴人  
嗟嗟良久歸明日轉相語稱異焉後時時人  
窺之見所娛其母者多類是自是諸貴人每

宴輒置餘豆間曰以待孝乞兒也吳下至今  
口其事云其一居浙之長興里蓋推魯人也  
獨事母有至性其舊業俱以養母故至衰落  
僅餘屋數椽矣其從父獨贏于貲一日飲諸  
媼呼孝子侍媼多豪貴人饌具腴美孝子未  
及舉即私念曰今何緣得致我母前耶則時  
時目左右眇每伺賓所不顧急摘諸甘脆品  
裹紙納袖中未見一再御即御若未嘗旨焉  
紙盡而袂已盈盈矣縮縮逡巡席間復私念

曰、令何緣客罷、即致我母前、耶會席闌酒酣、主人出金卮酒、貴客、貴客不勝酒、以卮置樓簷間、覆以瓦、先問歸、俄侍者報亡其卮、衆客欲自明、約曰、請急扃戶、令人人袒檢之、必得乃已、孝子兩手捫袖中、至羞澁也、倉卒不得計、即謬曰、由我、詰出之、則曰、匿他所矣、至後再詰之、則又謬曰、求諸所不得、或為他人乘也、奈何、然當卒償之耳、詰反從父責所償孝子、願鬻其屋、且曰、幸稍寬我、俾先僦屋奉母

居、今無訴也、不爾、懼傷母心、從父雖嗔、悉聽其語、亟道母氏已默默心動矣、無何、貴客憶前庖、乃折簡主人、語以故、且曰、昨倉徨歸、將無枉君家僕耶、主人如言、檢之得、急呼孝子至、孝子猶謬對如初、從父曰、癡兒、吾業已得庖、知非若矣、顧若何苦自誑、吾不聽名、孝子始吐實、淚淋漓下曰、某苦不能勉奉母氏、懽而兒女態若此、比諸貴客在、設令把我袖、將大詬我、且重為叔父羞、故寧爾爾、從父大感

悟曰、若欲孝、乃力不能、我即羸餘、頽而豚犬  
兒、能萬分一不耶、乃召前坐上客、遍語之曰、  
是子如是如是、忍與吾兒二視哉、率三分其  
產、令得終奉母焉、聞其族里至今多禮讓、人  
謂遺風所漸云、贊曰、孔子有言、啜菽飲水盡  
其歡斯之謂孝、乃丐子殆契是乎、世之能具  
五鼎八珍、前羅而不能令其親一開顏者、豈  
少哉、令人脉脉感愴矣、或曰、行乞至詬辱  
親也、不知彼營營競進者、視乞墻何如矣、究

所止能以見顯否耶懷肉至自誣事若甚駭  
可憫乃其顧養一念即古顯封人奚邾焉卒

感叔氏風施後世有以也夫

余舊曾聞吳郡侯甸西樵野記

中載孝丐見事不知與耿所傳者即是一人或各自一人附錄于此長洲之相城一丐見

每詣沈隱君孟淵所請丐凡所得多不食而分貯之筒篋中隱君初不為意久而問焉對

曰將以供母隱君始異之潛令人睨其所為丐至野岸一舟中舟雖陋而頗潔老媪處其

中丐方出物治之陳食母前傾酒跪而奉之伺母扶盃乃起跳舞唱山歌嬉戲以娛母母

意殊安之也必母食盡更為他求常日如之母死丐卒不見夫丐者知曲意悅親若是而

况世之不為丐者采

田汝成醉鄉律令一篇其引云皇甫嵩作醉鄉  
日月條刺飲事三十篇自謂酒史之董狐矣  
第其叙述稍冗肯綮弗章讀之不能無遺悵  
焉予也陸沉丘壑託契麴生晨夕相從情好  
甚篤惜其風味久溷于俗子而品詠未罄于  
高賢也取皇甫氏之意而芟繁撮要易其未  
然而補其未備著為醉鄉律令一篇庶使酒  
身濡首者有所禁而不淫齊聖溫克者有所  
循而益謹爾嗟乎選勝賞心能無崇飲千鍾

百榼貴在德將在昔賢豪咸非情者酒中之  
趣先得我心予誠有味於酒乎聊以韜精光  
澆磊落耳嘉靖三十年春三月逃禪子書於  
西湖社中 醉鄉律令 醉鄉之宜十有一  
醉花宜晝 醉雪宜夜 醉月宜樓 醉  
暑宜舟 醉山宜幽 醉水宜秋 醉佳人  
宜微醺 醉文士宜妙令酌無苛 醉豪客  
宜揮觥發浩歌 醉將離宜鳴鼉 醉知音  
宜樂侑語無它 酒徒之選十有三 款於



辭而不佞者 愉於色而不靡者 怯猛飲  
而惜終懽者 撫物為令而不涉重者 聞  
令即解而不再問者 善戲謔而不虐者  
語便便而不亂者 持屈爵而不分慙者  
偕衆樂而惡外囂者 飛爵騰觚而德儀無  
愆者 坐端凝而神爽逸者 寧酣沉而不  
傾潑者 酒所不歡之候十有四 主人者  
一也 賓輕主二也 會客不投三也 殺  
核雜陳而不序四也 妓驕而樂澁五也

說家常六也 議朝除七也 迭訴諧八也

刻觴政九也 錄事不綱十也 興居紛

紆十一也 附耳囁語十二也 茂章程而

騁牛飲十三也 醒木訥而醉勞曹十四也

楊王孫西京雜記云楊貴字王孫文翁張崇文

歷代小誌云文翁姓名黨字仲翁壺關三老

荀悅漢紀云令狐茂此三人名足以補班史

之闕

常熟徐駿字叔大號積菴成化弘治時人少偶

蓄鵠父撻之、遂篤志于學、後父亡、遇鵠飛鳴、  
必思親訓、涕泣不已、人稱爲泣鵠先生、弘治  
中年、與先君同以非辜、邂逅于其邑之獄、遂  
授先君書、先君至七十餘、三體鼓吹二帙、嘗  
對客倒誦、每曰、皆先生之功也、常熟志止載  
其所著對類、總龜而反遺泣鵠事、故私著之、  
茹子根煎湯浴足、能治竈瘰、竈瘰、足跟凍瘡也、

常熟嚴養齋公訥

聖上賜以泥金綵繪斗聖祖師神像各一軸、特

募建雄殿於拂水巖、以敬虔奉、四方進香者、  
以萬計、殆所謂一國之人皆若狂者乎、余老  
朽、亦從衆登巘、書數語于壁、相臣寵 帝賚  
寶殿煥嵯峨、式廓茲山勝、聿昭祗 聖阿兩  
湖回雲漢、環峰鎖煙蘿、天心本自眷、福地豈  
緣多、士女驚快覩、神物慎擁呵、同志二三子、  
探竒走委蛇、臨風豁醉顏、雙眼窺肩摩、登斯  
聊自憇、拍手發浩歌、浩歌非不樂、還願吐辭  
波、上以廣 帝渥、下以瘳相痾、民力真無賴、

脂膏竭既多無益害有益都俞曾及麼聽人不聽神古道當如何

宋陳龍川中興遺傳序云初龍可伯康游京師輩飲市肆方叫呼大噉趙九齡次張旁行過之雅與伯康不相識俄追止次張牽其臂迫與共飲次張之父時守官河東方以疾聞次張以實告伯康曰毋苦乃翁疾行瘳矣子可人意者為我姑少留次張不得已從之箕踞笑歌恢諧縱譁旁若無人次張固已心異一

日行城外過麻村觀大閱之所伯康勃然曰  
子亦喜射乎次張曰頗亦好之而不能精也  
伯康曰姑試之次張從旁取弓挾矢以與十  
發而貼中者六七次張心頗自喜伯康拾矢  
而射一發中的矢矢相屬十發亡一差者次  
張驚曰子射至此乎伯康曰此亦何足道千  
軍萬馬頭目轉動不常意之所指猶望必中  
况此定的又何怪乎次張吐其舌不能收俄  
指其地而謂次張曰後三年此間皆胡人子

姑識之火龍騎日飛雪滿天此京城破日之  
兆因嘻吁長嘆不能自禁後三年京城失守  
其言皆驗中原流離伯康自是不復見矣豈  
喪亂之際或死於兵抑有所奮而不能成也  
次張每念其人言則嘆惜紹興初韓世忠拒  
虜於淮西力頗不敵次張獻言乞決淮西之  
水以灌虜營朝廷易其言而不之信已而虜  
師俄退世忠力請留戰虜酋使謂曰聞南朝  
欲決水以灌我營我豈能落人計中次張言

雖不用猶足以攻敵人之心者類如此次張  
嘗為李丞相所辟得承務郎督府罷次張亦  
徑歸大駕南渡次張僑居陽羨故將岳飛嘗  
隸丞相軍中次張識其人於行偽言之丞相  
給帖補軍校後為統制遇大駕巡永嘉與諸  
將彷徨江上莫知攸適又乏糧將謀抄掠次  
張聞而竟往說飛移軍陽羨州給之食飛得  
無他而州境賴焉人有言次張生平於趙丞  
相者丞相喜欲用之復有譖者曰此人心志



不可保。使其得志。必為曹操丞相。疑沮而止。  
次張度時。不用屏居不出。竟死。昔參政周公  
葵屢為余言其人。且曰。我嘗薦之朝廷。諸公  
皆詰我子端人正士。胡為喜言此等狂生。我  
因告之曰。吾儕平居。譚王道。說詩書。一日得  
用。從容廟朝。執持紀綱。可也。至於排難解紛。  
倉卒萬變。此等殆不可少。吾儕既不能辦。而  
惡他人之能辦。是誣天下以無士。而期國事  
之必不成也。是烏可哉。余嘗大周公之言。異

二生之為人而惜其屈。嘗欲傳其事而不能。詳因嘆曰。世之豪偉倜儻之士。沈沒於困窮。不能自奮。以為世用。欲用而卒沮於疑忌。如二生者。寧有限哉。然自古亂離戰爭之際。往往奇才輩出。嶄然自赴功名之會。如建炎紹興之間。誠亦不少。雖或屈而不用。用不六太或不終。未四十年。已有不能道其姓字者。記事之文。可少乎哉。自是始欲纂集異聞。為中興遺傳。然猶恨聞見單寡。欲從先生故老。

詳求

其事故先為之纂例而以漸足之。其一日大  
臣若李綱、宗澤、呂頤浩、趙鼎、張浚。其二曰大  
將若种師道、岳飛、韓世忠、吳玠、吳玠。其三曰  
死節若李若水、劉韜、孫傳、霍安國、楊邦乂。其  
四曰死事若种師中、王禀、張叔夜、何鼎、劉瑛。  
徐徽言。其五曰能臣若陳則、程昌禹、鄭剛中。  
其六曰能將若曲端、姚端、王勝、劉光世、劉錡。  
其七曰直士若陳東、歐陽澈、吳若。其八曰俠  
士若王友、張所、劉位。其九曰辨士若邵公序。

祝子權、汪若海、其十曰義勇、若孫韓、葛進、石  
身、其十一曰羣盜、若李勝、楊進、丁進、其十二  
曰賊臣、若徐秉哲、王時雍、范瓊、合十二問而  
分傳之、總目曰中興遺傳、聊以發其行事而  
致吾之意、然其端則起於惜二生之失其傳、  
故序首及之、

龍川大周公之言、愚謂此言乃  
用世者所當書、諸紳也、

梁簡文云、船神名馮耳、又呼孟公、孟姥、

山林窮四和香、以荔枝殼、甘蔗滓、乾栢葉、黃連

和焚、又或加松毬、棗核、梨核、皆妙、

墨娥小錄  
四棄餅子

香與此相同。荔枝殼、松子殼、梨皮、甘蔗、枳、右  
 各等分為細末，梨汁和丸。小雞頭大，捻作餅  
 子，或搓如粗燈草大。陰乾，燒妙，加降真屑、檀  
 末同碾尤佳。

我卷老人漫筆卷之四

素友乙丑三月五日湖上  
 早丁卯六月廿九日湖上